

NAARECHLAPF 2016



Banana! Ig begrüesse euch alli am hütige Naare-Chlapf ond zum Sponsoreapéro.

Lang heimer druf gwartet, vorbereitet, baut ond gmolet... d`Fasnacht isch ändlech do...

Liebs Hanni, für e Schlüssel due ig me ganz härzlech bedanke, und eis wott ig dir säge:

Be eus bisch immer präsänt, losch es au hier ond da, a der Fasnacht la fääge!

Das du d`Naarezyt chasch gniesse, ond ned wotsch gstört wärde in Negerchinge vom Blick

Gibe ig der guete Rat, schick doch per Poscht, die Kommentar, uf em ne: USB-Minion-Stick!

Euse hütig Alass, duesch du; mit dinere Red ergänze...

Und das de no in Dütsch...das git kei Verwies, ond mer düe di ned usgränze!

Jetzt, i der füfte Johreszyt, be chüelem Wätter, ond mängisch dickem Nääbu

Wenn ig so id Rundi luege... gseh ig keini trägerlose Tops oder sogar Buchnääbu!

Mer chöme als Fasnächtler kleidet ond nid im Kampfrose-Look

Wenn de gar nüüt, zom alege fingsch... chum doch als Donald-Duck!

Chämti de öppe no höche Bsuech usem Morgeland a eusi Fasnacht, mer würde keini öffentlichi Kunschtwärk verstecke!

Stell der mal vor, mer müesste euse schöni Chräiekreisel wäge andere Kulture mit Tüecher abdecke!

Es riesigs Merci a alli Hälfer, Chrampfer, Plakettechäufer,
Gönner ond Sponsore

Dank eurer Unterstützig mit Rat ond Tat, got d`Fasnacht in
Negerchingen ned verlore!

Trickföum ab!, Thömu der 1: due ig a der Fasnacht regiere ond
be mit derbi

Wenn mer`s zäme luschtig hei, i der Beize oder a de Umzüg
zäme si.

Löet euch lo überasche, was alli Teilnehmende für di kommendi
Naare-Zyt vorbereitet händ...

Zäme mit fätzigen Guggesound, bunte Kleider ond
Trickföumfigure, nähme d`Nächt bestimmt keis Änd.

Morn am Morge, 05.00... startet d`Chesslete, sorry... lärme düe
mir derbi nid vermide, der Böllerknall choi mer chum erwarte...

Wär i dere Zyt no im Näscht liegt ond duet erwache, wird halt
früecher i neu Tag dörfre starte.

Alles isch scho, sid letschter Wuche parat ond super dekoriert

Dame vom Alterheim-Coiffeure g`stylet ond früsch friesiert

Am 14.00 geits dört witer mit Musig, Tanz, Gsang ond der
Kinderfasnacht

Wenn de Juniore mit de Seniorinne ond Seniore i Fahrt chöme,
nämet nech i Acht!

Ab de 8 te geits i de Beize; im von Arx, im Bistro ond im Motel
los...

Hoffe d`Spannig uf Gsang ond Schnitzelbänk isch jetzt scho
gross!

Weit der s`Tanzbei schwinge, Köschtüm gseh, Maske bestune,
ässe ond aastosse am Chräieball

De chömet am Fritig ab 19.30 im Mühlemattareal i grossi Kinosaal!

Am Samschtig ab 13.30, Juhee...kei Durchgangsverkehr ir Martins-Stross uf ond ab

Denn startet euse Dorfumzug, das Johr i der Grössli mit Gugge, Sujets ond Wääge...öppe gar ned knapp!

Aschliessend mit Gugge-Monschterkonzärt und Kindermaskeball

Und ab 19.00 zwöiti Rundi Beizefasnacht, Unterhaltig ond Schnitzelbänk i jeededem Fall.

Am Sunntig 10.00 Fasnachts-Gottesdiensch, dass heisst scho früeh uf der Bei,

Denn am däm Tag, si mer ned nur in Negerchinge dehei...

Gäng wie gäng am Sunntig Nomi, das isch ned neu

13.30 Umzog Wolfwil, mer bliebe... „Treu im Gäu“.

Am Obig ab 20.00 farbigs Discoliecht, Guggesongs ond Barbetrieb be de Zapfhähne

Be dere „Party“ got Poscht ab... und isch ned zom gähne!

Am D`ischtig geits de am 14.00 witer im Gaschthof von Arx, und das mit viel „Reiz“

D`Seniore mit em Huetli uf em Kopf ond der bekannte Polonaise „krüz ond quer“ dör d`Beiz.

18.45 Chlifäld-Schuelhuus, Böllerknall...s`aktive Alter isch denn voll parat und im Schuss!

Langsam geit`s am Ändi entgäge, em Fasnachtsschluss...

Alli... dörfe „Ihn“ begleite...uf sim schwäre Wäg uf d`Matte bem Mühli-Platz...

Der Böög söll verbrönnt wärde, doch das isch euse Bruch ond ned für d`Chatz.

Ab 20.00 isch de no di letschti Beizefasnacht ond der Usklang

Irgendeinisch goht de au der letschti „ganz happy“ hei vom „Trickföum ab!“ Uusgang...

Der Minion vo Negerchinge mit em Naare-Rot, wönscht euch allne e tolli Fasnacht...„Trickföum ab!“ sid mit der bi

Erinnerige nach der Fasnacht cha nur ha...wär am einte oder andere Alass au isch gsi...

Banana...ond viele Dank!!!

Eue Chräievatter Thömu der I.

